

Club Selva Sagogn

Statuts

I. Num e sedia

- Art. 1 Il Club Selva Sagogn ei in'uniun tenor dretg svizzer ed ei suttamess agl art. 60 ff dil Cudisch civil svizzer CCS. El cumpeglia la regiun Sagogn e contuorn, e la sedia ei il liug da domicil dil president.
- Art. 2 Il Club Selva Sagogn ei affiliaus cun tut ses commembers alla Federaziun da skis svizra (Swiss-Ski) ed alla Federaziun regionala da skis e snowboard dil Grischun (SSGR).

II. Intent e finamiras

- Art. 3 Il Club Selva Sagogn ha igl intent da promover e tgirar il sport da cuorsa liunga. Speciala peisa dat el alla formaziun e promoziun dalla giuventetgna.

III. Commembronza

- Art. 4 Il club cumpeglia suandonts commembers:
- Commembers A** ein commembers che fan buca part ad in auter club da skis, respectiv ch'ei leu mo commembers C. Commembers A ein commembers dalla Swiss-Ski e dalla SSGR. Els han il dretg da vuschar e d'eleger.
 - Commembers B** corrispundan als commembers A, els giavischan denton negins organs da publicaziun dall'associaziun.
 - Commembers C** ein mo commembers dil club, perquei ch'els ein gia commembers dalla Swiss-Ski e dalla SSGR entras in auter club da skis. Els han il dretg da vuschar e d'eleger.
 - Participonts da G+S (giuventetgna e sport)** separticipeschan als cuors per G+S. Els pagan negina contribuziun da commembers. Contribuziuns allas federaziuns surpren il club. Els han negin dretg da vuschar.
 - Fauturs** ein personas naturalas ni giuridicas che sustegnan il club finanziaimein.

- Art. 5 **Recepciun da commembers dil club**
Commember dil Club Selva Sagogn daventa mintgin che paga la contribuziun annuala.
- Art. 6 **Extrada**
L'extrada succeda cun ina declaronza en scret per mauns dalla suprastonza sin la fin digl onn da gestiun.
- Art. 7 **Exclusiun**
Commembers che cunterfan als principis dil club san vegnir exclus dalla radunonza generala sin damonda dalla suprastonza. Sche la contribuziun annuala vegn dus onns in sunter l'auter buca pagada, vegn il commembers exclus automaticamein.
- Art. 8 **Contribuziun da commembers**
Las contribuziuns annualas vegnan fixadas dalla radunonza generala. Ellas vegnan mintgamaì incassadas igl atun pigl onn da gestiun current.
- Art. 9 **Responsabilidad**
Per las obligaziuns dall'uniun garantescha mo la facultad dall'uniun. Mintga responsabilidad persunala ed obligaziun da far in pagament supplementar per las obligaziuns dall'uniun che survargan la contribuziun annuala ei esclusa.

IV. Organs

- Art. 10 Ils **organs** dil Club Selva Sagogn ein:
- la radunonza generala (RG)
 - la suprastonza
 - ils revisurs da quen e gestiun
- Art. 11 La **radunonza generala** ei igl organ suprem dil Club Selva Sagogn. Ella ha liug annualmein, per regla igl atun. L'invitaziun cun la gliesta da tractandas succeda sil pli tard duas jamnas avon il datum dalla RG entras publicaziun el „Fegl official Surselva“, sco era ella „Arena alva“. Commembers d'ordeifer (q.v.d. commembers che habiteschan ordeifer il circuit da distribuziun dil Fegl official) retscheivan in'invitaziun persunala. La RG vegn menada dil president.

- Art. 12 La RG concluda davart suandontas fatschentas:
- eleger la suprastonza ed ils revisurs
 - approbar il rapport annual dalla suprastonza, il quen annual, il preventiv, sco era il rapport dils revisurs
 - dar la descharscha
 - fixar las contribuziuns annualas
 - tractar las fatschentas tenor la gliesta da tractandas
 - decider davart propostas da commembers ch'ei vegnidas inoltradas silmeins 5 dis avon la RG en scret al president.
- Art. 13 Mintga RG ch'ei vegnida convocada conform agl uorden ei cumpetenta da decider.
- Tier elecziuns e votaziuns vala il pli relativ dallas vuschs valeivlas. Tier egalitad dallas vuschs dat il president la vusch da tagl. Elecziuns e votaziuns succedan cun maun pli, nunch'ei vegni pretendiu e concludiu dalla RG ina votaziun cun scrutini.
- Art. 14 Ina RG extraordinaria sa vegnir convocada dalla suprastonza. Entras ina damonda en scret da silmeins in tschunavel dils commembers cun dretg da vuschar vegn la suprastonza obligada da convocar ina RG extraordinaria.
- Art. 15 La **suprastonza** dil Club Selva Sagogn consista orda silmeins 5 commembers cun las suandontas funcziuns:
- president
 - actuar (vice-president)
 - cassier
 - chef G+S
- Il president ed ils commembers dalla suprastonza vegnan elegi dalla RG per ina perioda d'uffeci da treis onns. La suprastonza seconstituescha sesezza. Tier elecziuns complementaras vegn il niev commember da suprastonza elegius pil rest dalla perioda d'uffeci ordinaria. Ina reelecziun ei pusseivla.
- La suprastonza ei cumpetenta da decider sche silmeins 4 commembers da suprastonza ein presents. Tier egalitad dallas vuschs dat il president la vusch da tagl.
- Art. 16 La suprastonza ei responsabla per la direcziun dil Club Selva Sagogn.
- Ella dispona sur da tuttas cumpetenzas da decider dil club ch'ei buca surdadas expressivamein ad in auter organ. Ella exequescha las fatschentas ordinarias dil club. La suprastonza representa il club anoviars. Ella segna entras la sutscriziun dil president e d'in auter commember da suprastonza.

- Art. 17 La suprastonza ei cumpetenta da decider sur d'expensas ch'ei ella rama dil preventiv ch'ei approbaus dalla RG. Obligaziuns che survargan la rama dil preventiv astga la suprastonza mo surprender cun in'approbaziun dalla RG. En cass urgents sa quei era succeder posteriuromein.
- Art. 18 Ils **dus revisurs da quen e gestiun** vegnan mintgamai elegi dalla RG per ina perioda d'uffeci da treis onns. Els san vegnir reelegi.
- Ils revisurs han da controllar il quen dalla suprastonza ed il rapport per mauns dalla RG. Els fan in rapport per mauns dalla RG sur da lur controllas.

V. Diversas

- Art. 19 Igl onn da gestiun dil Club Selva Sagogn cuoza naven digl 1. d'october tochen ils 30 da settember.
- Art. 20 Ina midada da statuts sa mo vegnir concludida dalla RG cun in pli da duas tiazas dallas vuschs valeivlas.

VI. Dissoluziun

- Art. 21 Ina dissoluziun dil Club Selva Sagogn succeda sin la via da midada da statuts. Schi ditg che diesch commembers cun dretg da vuschar sedeclaran d'esser prompts da cuntinuar cun il club, sa il Club Selva Sagogn buca vegnir dissolvius. En cass d'ina dissoluziun decida la radunonza suenter haver pagau tut las obligaziuns sur dil diever dalla facultad dall'unium.

Quests statuts ein vegni approvai alla radunonza generala dil Club Selva Sagogn dils 12-10-2001. Els ein vegni approvai igl 1. da matg 2001 entras il presidi dalla "Federaziun da skis svizra" (Swiss Ski).

7152 Sagogn, 12-10-2001

Club Selva Sagogn

President

Actuara

Luis Poltéra

Karin Candrian